



UNIVERSITÄTS-  
BIBLIOTHEK  
PADERBORN

## Universitätsbibliothek Paderborn

### **Aqvæ Vitæ, De Fontibvs Salvatoris. hoc est, Doctrina Evangelica De Meditatione mortis**

**Kispenning, Henricus**

**Antverpiæ, 1583**

Liber Qvintvs. Precationes piæ, in morbo ac Mortis periculo dicendæ: & in  
Passionem D. N. Iesu Christi Meditationes: ad iuuandum agrotum  
accommodatæ.

[urn:nbn:de:hbz:466:1-46214](https://nbn-resolving.org/urn:nbn:de:hbz:466:1-46214)

## LIBER QUINTVS.

SIVE

## PRECATIONES PIÆ,

IN MORBO, AC MORTIS  
periculo dicendæ, & in Passionem Do-  
mini nostri Iesu Christi Meditationes: ad  
iuuandum ægrotum accommodatæ.

Quomodo oraturi Affectus dirigendus & compo-  
nendus: D. Basilij Mag. Admonitio.

CAP. I.  
Constit.  
exercitoria-  
rum cap. 1.



RATIONIS duo sunt modi: alter  
Glorificationis cum humilitate, alter  
Petitionis illo inferior. Orans igno-  
ne statim ad petitionem deueniat, quod  
quod si non feceris, detegis propositum  
tuum, quod à necessitate coactus Deum  
adoras. Vbi itaque incipis orationem, sine terram, tran-  
scende caelum, relinque omnem visibilem & inuisibilem  
creaturam, & incipe à glorificatione Conditoris ver-  
uerforum, Benedico te Domine longanimū & toleran-  
tem malorum: qui pateris me quotidie peccantē, & da-  
nobis omnibus pœnitentia potestatem. Propterea cum  
taces ac sustines nos Domine, ut te generis nostri saltem  
disponentem glorificemus: qui aliquando per timorem,  
aliquando per admonitionem, aliquando per prophetas,  
postea verò per presentiam Christi tui nos visitasti. Tu  
enim fecisti nos, & non ipsi nos: in es Deus noster. Cum  
autem glorificaueris ut potes & miseris laudem ad  
Deum: tunc incipe cum humilitate, & dic: Ego quidem  
Domine

Domine, non sum dignus ut loquar coram te, quia valde peccator sum. Gratias ago tibi, quod patiens fuisti ob peccata mea, & usque ad hoc tempus me impunitum dimisisti. Ego enim dignus eram olim innumera mala pati, & a facie tua abici. Verum tolerans malorum benignitas tua erga humanum genus patiens fuit ob me. Gratias ago tibi, etiamsi non sum sufficiens ad gratiarum actionem, pro illa malorum tolerantia tua. Tunc deinceps pete, quod debes petere: non divitias, neque gloriam terrenam, non corporis sanitatem. Ipse enim te fecit, & tua salutis curam gerit: & novit quod unicuique conducit, sine sanum esse, sine agrotare. Sed pete quemadmodum tibi preceptum est, Regnum caelorum: & de necessitate corporis tui, ipse curat. Munificentissimus est enim Rex noster, & indignatur si quis parvum quid ab ipso petat. Pete ergo tibi ipsi digna Rege Deo: petens autem digna Deo, ne desisteris donec accipias. Hoc enim innuit Dominus in Evangelio, Luca 11. Exemplum enim sumit ab homine ad hominem, ut discas nunquam desperare, ut ubi petieris & non acceperis, non desistas donec accipias: & patienter pulsa ostium Domini. Omnis enim qui petit accipit: & qui quatit invenit: & pulsanti aperietur. Vis discere o dilecte, quomodo patientes fuerint sancti, & non desperarunt? Ad Abraham dixit Deus: Tibi dabo terram hanc & semini tuo post te, & velut sidera caeli, sic erit semen tuum, quod non enumerabitur. Et praeterit multus annorum numerus, & mortificata fuit ipsius natura: praeforis autem ipsius erat mors, & non dixit, Domine semper mihi filios promittis, & patrem me omnium gentium futurum praedicis: falsa est promissio tua. duo enim senes qualem spem habemus? Non dixit haec, non cogitavit, sed fide incommuni permansit: & aetate quidem senescebat, spes autem

Mat. 6.

Genes. 15.  
Roman. 4.

juvenesce

inueneſcebat. Deus eſt, inquit, qui promiſit. Ipſe eſt qui etiam impoſſibilia poſſibilia facit. Imitare fidem Abraha. Qui illi promiſit multiplicare ſemen ipſius, etiam nobis promiſit petentibus exhibere petitionem noſtram: dicit enim, Venite ad me omnes, qui laboratis & onerati eſtis, et ego reficiam vos. Nam cum tu longe ab ipſo abeſſis, ob languentem te & peccati onere granatum, miſericordia motus, te accerſuit, vt te onere leuaret, & de cateris requiem largiretur.

Math. 11.

Precatio in Morbo, & alia quauis Afflictione.  
Ex Tobia cap. 3.

CAPVT  
II.

**I**uſtus es Domine, & omnia iudicia tua vera ſunt, & omnes viae tuae miſericordia & veritas. Et nunc Domine memor eſto mei, & ne vindictam ſumam de peccatis meis, neque reminſcaris delicta mea, vel parentum meorum: quonia non obediuius preceptis tuis. Et nunc Domine ſecundum voluntatem tuam fac mecum: & praeſcipe in pace recipi ſpiritum meum.

D. Auguſtini Precatio, pro Patientia in Afflictione, vel Morbo.

CAPVT  
III.

Ex lib. Meditationum,  
cap. 38.

Pſal. 118.  
1. Pet. 5.

**M**iſerere Domine, miſerere pie: miſerere mihi miſerrimo peccatori, indigna agenti, & digna patienti. Si penſo malum quod feci, non eſt tantum quod patior: grauius eſt quod commiſi, lenius eſt quod tolero. Iuſtus es Domine, & rectum iudicium tuum: & non eſt vlla iniquitas in te. Tibi cura eſt de omnibus, praecipue de ſeruis tuis, qui totam ſpem ſuam poſuerunt in ſola miſericordia tua. Idcirco obſecro & ſuppliciter rogo, vt non facias mihi ſecundum peccata mea, quibus iram tuam merui: ſed ſecundum magnam miſericordiam tuam, qua ſuperant peccata etiam totius mundi. Tu Domine,

qui exterius flagella irrogas, da semper interius indeficientem patientiam: ita ut laus tua non recedat de ore meo. Misere mei Domine, misere mei: & adiuua me, sicut tu nosti, quod mihi necesse est, in corpore & in anima. Scis omnia, potes omnia: qui vivis in secula. Amen.

Alia, pro obtinenda Patientia, in Morbo, seu alia Afflictione

**C**lementissime Redemptor, qui semper es misericors, semper es servator. siue tristitia nobis immittis, siue letitia. Magna enim misericordia est, dum per externas afflictiones, perque temporarias molestias preparas nos ad sempiterna gaudia: quandoquidem hanc ad veram felicitatem viam ipse nobis tuis praeignasti vestigiis, da ut hunc calicem velut abs te porrectum patienter & obedienter ebibam. Si visum est addere doloribus: adde & Patientia donum. Tibi subiecta est anima mea, quoniam abs te patientia mea: quia tu Deus meus, servator meus & adiutor meus: Deus auxilij mei, & spes mea in te est. Tibi gloria in secula. Amen.

CAPVT

IIII.

Eraf.

1. Pet. 2.

Psal. 61.

Ægrotantis Precatio.

**O**Mnipotens & misericors Deus, qui per aegritudines corporales nos nostra admones mortalitatis, renocans ad penitentiam. Ad te clamo ex toto corde meo: ne in furore tuo arguas me, neque in ira tua corripas me. Misere mei Domine, quoniam infirmus sum: saluum me fac propter misericordiam tuam. Sana me Domine, & sanabor: saluum me fac & saluus ero: quoniam laus mea in es. Tu vulneras & mederis: percussis & manus tue sanant. Tu occidis & vivificas: deducis ad inferos & reducis. Proinde si haec infirmitas non est ad mortem: fer opem

CAP. V.

Psal. 6.

Ierem. 17.

Iob 5.

Tob. 13.

b 3

fer opem

Ioannis. 11.  
Psal. 40.  
Psal. 39.

Tob. 3.  
Psal. 30.

fer opem super lecto doloris mei. Placeat tibi Domine ut  
eruas me: Dñe ad adiuvandum me respice. Si autē ex-  
ped. t. m. h. iam mori magis quam vivere: fac mecum se-  
cundum voluntatem tuam: & præcipe in pace recipi  
spiritum meum: quem in manus tuas comendo. Qui vi-  
vis & regnas Deus, in secula seculorum. Amen.

In Mortis periculo, Precatio.

CAPVT  
VI.  
Eras.

**D**omine Iesu Christe, unica salus viuentiū, aeterna  
vita morientū: tua sanctissima voluntati me to-  
tum submitto, tradoque: siue hanc animam in huius cor-  
pusculi domicilio diutius commorari placeat ad tibi ser-  
uendum, siue ex hoc seculo demigrare velis: certus, non  
posse perire, quod tua misericordia commissum est. Car-  
nem hanc fragilem ac miseram a quo deponam animo,  
videlicet spe Resurrectionis: qua mihi illam reddet mul-  
tò feliciorē. Animam quoq; ut aduersus omnia tenta-  
menta tua gratia corroboret: contraque omnes Satana  
assultus cinge me scuto tua Misericordia: qua olim  
martyres tuos aduersus horrendos cruciatus, ac mortis  
crudelissimos, inuictos reddidisti. Video quā nihil in  
me sit presidij: in tua inenarrabili Bonitate tota est fi-  
ducia mea. Nihil habeo meritorum, quod allegem apud  
te: malorum heu nimis multum video: sed per tuam ius-  
titiam confido me in numero iustorum censendum. Tu  
mihi natus es, mihi sitiisti, mihi esuristi, mihi docuisti,  
mihi orasti, mihi ieiunasti: mihi tantum bonorum ope-  
rum in hac vita peregisti: mihi tam acerba passus es,  
mihi in cruce pretiosam animam tradidisti. Pro sint mi-  
hi nunc, qua sponte donasti. Tuus sanguis abluat ma-  
culas criminum meorum: tua iustitia regat iniustitiam  
meam: tua Merita me supremo iudici commendent.  
Ingrauescente malo, adauge gratiam tuam: ne vacillet  
in me

in me Fides, ne titubet spes, ne frigescat Charitas, ne terrore mortis deiciatur humana infirmitas: sed postquam mors occuparit oculos corporis, mentis tamen à te non desleatantur: cùmque lingua vsum ademerit, cor tamen instanter ad te clamet: IN MANVS TVAS DOMINE COMMENDO SPIRITVM MEVM. Cui laus, honor & gloria sine fine, Amen.

Psal. 30.  
Luc. 23.

Eiaculationes ex Psalmis, cùm aliàs, tum præcipuè in Mortis necessitate dicendæ.

**D**omine ne in furore tu arguas me: neq. in ira tua **CAPVT**  
corripias me. Miserere mei Domine, quoniam infirmus sum: sana me Domine: quoniam conturbata sunt **VII.**  
ossa mea. Et anima mea turbata est valde: & tu Dñe **Psal. 6.**  
vsque quo? Convertere Domine, & eripe animã meam:  
saluum me fac propter misericordiam tuam.

Conserua me Domine, quoniam speravi in te. Sis **Psal. 15.**  
in conspectu meo semper: & à dextris mibi, no commovear.

Inclina aurem tuam mibi: mirifica misericordias **Psal. 16.**  
tuas, qui saluos facis sperantes in te. Custodi me vt pupillam oculi: sub vmbra alarum tuarum protege me.

Domine ne elongaueris auxilium tuum à me: ad defensionem meam conspice. **Psal. 21.**

Ad te Domine lenani animam meam: Deus meus in **Psal. 24.**  
te confido, non erubescam. Reminiscere miseracionum tuarũ Domine: & misericordiarum qua à seculo sunt. Delicta iuuentutis mea & ignorantias meas ne memineris. Secundum misericordiam tuam memento mei tu, propter bonitatem tuam Domine. Tribulationes cordis mei multiplicatæ sunt: de necessitatibus meis erue me. Vide humilitatem meam & laborem meum: & dimitte vniversa delicta mea. Custodi animam meam & eripo

b 4

& eripo

- Psalm. 16. *Et eripe me: non erubescam quoniam speravi in te. Adiutor meus esto, ne derelinquas me: neque despicias me Deus salutaris meus.*
- Psalm. 30. *Illustra faciem tuam super seruum tuum: saluum me fac in misericordia tua. Domine non confundar, quoniam inuocaui te.*
- Psalm. 37. *Domine ante te omne desiderium meum: & gemitus meus à te non est absconditus. Cor meum conturbatum est in me: dereliquit me virtus mea. Ne derelinquas me Domine Deus meus: ne discesseris à me. Intende in adiutorium meum, Domine Deus salutis mea.*
- Psalm. 39. *Complaceat tibi Domine, ut eruas me: Domine ad adiuvandum me respice. Adiutor meus & protector meus tu es: Deus meus ne tardaueris.*
- Psalm. 40. *Domine miserere mei: sana animam meam, quia peccaui tibi.*
- Psalm. 50. *Miserere mei Deus: secundum magnam misericordiam tuam. Et secundum multitudinem miserationum tuarum, dele iniquitatem meam. Auerte faciem tuam à peccatis meis: & omnes iniquitates meas dele. Cor mundum crea in me Deus: & spiritum rectum innoua in visceribus meis. Ne proicias me à facie tua.*
- Psalm. 56. *Miserere mei Deus, miserere mei, quoniam in te confidit anima mea. Et in umbra alarum tuarum sperabo. Saluum me fac Deus, quoniam intrauerunt aquae usque ad animam meam. In multitudine misericordiae tuae exaudi me: in veritate salutis tuae. Eripe me de luto ut non insigam: libera me ab his qui oderunt me, & de profundis aquarum. Exaudi me Domine, quoniam benigna est misericordia tua: secundum multitudinem miserationum tuarum respice in me. Et ne auertas faciem tuam à me, quoniam tribulor, velociter exaudi me. Intende anima mea, & libera eam.*

Deus



Deus in adiutorium meum intende: Domine ad ad- <sup>Pfal. 69.</sup>  
 iuuandum me festina. Deus adiuua me. Adiutor meus  
 & liberator meus es tu: Domine ne moreris.

In te Dñe speraui, nō confundar in aeternū: in iustitia <sup>Pfal. 70.</sup>  
 tua libera me & eripe me. Inclina ad me aurem tuā, &  
 salua me. Esto mihi in Deum protectorem: & in locum  
 munitum, vt saluum me facias. Quoniā firmamentum  
 meum, & refugium meum es tu. Tu es patientia mea  
 Domine: Domine spes mea à iuuentute mea. In te con-  
 firmatus sum ex utero: de ventre matris meae, tu es pro-  
 tector meus. Cū defecerit virtus mea, ne derelinquas  
 me. Deus ne elongeris à me: Deus meus in auxilium  
 meum respice.

Inclina Domine aurem tuam, & exaudi me: quo- <sup>Pfal. 75.</sup>  
 niam inops & pauper sum ego. Custodi animam meam,  
 quoniam sanctus sum: saluum fac seruum tuum, Deus  
 meus sperantem in te. Misere mei Domine, quoniam  
 ad te clamaui tota die: latifica animam serui tui, quo-  
 niam ad te Domine animam meam leuaui. Quoniam  
 tu Domine suavis & mitis: & multa misericordia om-  
 nibus inuocantibus te. Respice in me, & misere mei.  
 Fac mecum signum in bonum: vt videant qui oderunt  
 me & confundantur: quoniam tu Domine adiuuisti me,  
 & consolatus es me.

Vsquequo Domine auertis in finem: exardescet sicut <sup>Pfal. 88.</sup>  
 ignis ira tua? Memorare quae mea substantia: nunquid  
 enim vanè constituisti omnes filios hominum?

Fiat misericordia tua vt consoletur me: secundū elo- <sup>Pfal. 118.</sup>  
 quium tuum seruo tuo. Veniant mihi miserationes tuae,  
 & viam. Tuus sum ego: saluum me fac. Adiutor &  
 susceptor meus es tu: & in verbum tuum super speraui.  
 Suscipe me secundum eloquium tuum & viam: &  
 non confundas me ab expectatione mea. Adiuua me, &

b 5 saluus

saluus ero. Fac cum seruo tuo secundum misericordiam tuam. Misericordie tuae multa Domine: secundum iudicium tuum uiuifica me. Erraui sicut ouis que perit: quare seruum tuum Domine.

Psal. 119.

De profundis clamaui ad te Dñe: Dñe exaudi uocem meam. Fiant aures tuae intendentes in uocem deprecationis meae. Si iniquitates obseruaueris Domine: Domine quis sustinebit? Quia apud te propitiatio est: & propter legem tuam sustinui te Domine.

Psal. 142.

Nō intres in iudiciū cum seruo tuo Domine: quia non iustificabitur in conspectu tuo omnis uiuens. Velociter exaudi me Domine: deficit spiritus meus. Non auertas faciem tuam a me. Eripe me de inimicis meis Domine, ad te confugi: educ de tribulatione animam meam.

Eiaculationes aliae, ex utroque Testamento collectae.  
2. Paralip. 36.

CAPVT  
VIII.

**T**U Domine omnipotens, benigne, longanimis & multum misericors, secundum multitudinem Bonitatis tuae, promissisti poenitentiam & remissionem iis, qui peccauerunt tibi: & multitudine miserationū tuarum decreuisti poenitentiam peccatoribus in salutem. Et nūc flecto genua cordis mei, precans a te bonitatem. Peccaui Domine, peccaui: & iniquitates meas agnosco. Quare peto rogans te: remitte mihi Domine, remitte mihi: & ne simul perdas me cum iniquitatibus meis, neque in aeternum iratus, reserues mala mihi: quia tu es Deus, Deus poenitentium: & in me ostēdes omnem bonitatem tuam, quia indignum saluabis me secundum magnam misericordiam tuam. Et laudabo te semper omnibus diebus uitae meae: quoniam te laudat omnis uirtus calorum, & tibi est gloria in secula seculorum. Amen.

Iere-

## Ieremiæ cap. 17.

*Sana me Dñe, & sanabor: saluum me fac, & saluus  
erit: quoniam laus mea tu es.*

## Baruch cap. 3.

*Dñe omnipotens, Deus Israël, anima in angustiis,  
& spiritus anxius clamat ad te: audi Domine & mise-  
rere, quia Deus es misericors: & miserere nostri, quia  
peccauimus ante te.*

## Danielis cap. 9.

*Dñe Deus noster, auertatur obsecro ira tua: & ex-  
audi Domine Deus noster oratione serui tui. Non enim  
in iustificationibus nostris prosternimus preces nostras  
ante faciem tuã, sed in miserationibus tuis multis. Ex-  
audi Domine, placare Domine, attende & fac: & ne  
moreris propter te ipsum Deus meus.*

## 1. Esdræ 9.

*Deus meus, confundor & erubescor lenare faciẽ meam  
ad te, quoniam iniquitates nostræ multiplicatæ sunt su-  
per caput nostrum, & delicta nostræ creuerunt vsque  
ad calum.*

## Matthæi cap. 15.

*Miserere mei Dñe, fili Dauid: Domine adiuua me.*

## Matthæi 9. &amp; 20.

*Domine miserere nostri fili Dauid: Domine miserere  
nostri fili Dauid.*

## Luçæ cap. 15.

*Pater Peccani in calum & corã te: iam non sum di-  
gnus vocari filius tuus.*

## Luçæ 18.

*Deus propitius esto mihi peccatori.*

*Precatiunculæ, siue Eiaculationes ad D. N. Iesum  
Christum, ex D. Augustini libris congestæ.*

**D**omine Iesu Christe, fili Dei vini, qui expansis in  
cruce manibus, propter mortalium omnium re-  
demptionem, hausisti calicem passionis: mihi hodie præ-  
bere

CAPVT  
IX.  
Meditation.  
cap. 39.

bere digneris auxilium. Ecce pauper venio ad te diuitem, miser ad misericordem: ne recedam vacuus.

Pfal. 37.

Ecce Domine, iniquitates meae supergressae sunt caput meum, & sicut onus graue grauatae sunt super me, & nisi tu, cui proprium est misereri semper & parcere, dexteram tuae maiestatis supponas, mergi cogor miserabiliter in profundum.

Pfal. 70.

Ecce insultat aduersum me inimicus, dicens: Deus dereliquit eum, persequar & comprehendam eum: quoniam non est qui eripiat. Et tu Domine vsquequo? Conuertere & eripe animam meam: saluum me fac propter misericordiam tuam.

Pfal. 6.

Placare obsecro, & miserere mei: & non auertas faciem tuam a me, qui pro me redimendo non auertisti faciem tuam ab increpantibus & conspuentibus in te.

Pfal. 101.

Esa. 50.

Fateor quia peccavi: & conscientia mea meretur damnatione, & poenitentia mea non sufficit ad satisfactionem: sed certum est, quod misericordia tua superat omnem offensionem. Noli quaeso piissime Deus scribere aduersum me amaritudines, ut intres in iudicium cum seruo tuo: sed secundum multitudinem miserationum tuarum dele iniquitatem meam.

Iob 13.

Pfal. 142.

Pfal. 50.

Tu Domine Iesu, non vis mortem peccatorum, nec letaris in perditione morientium: imo ut mortui uiuerent, tu mortuus es: & mors tua peccatorum mortem occidit. Et si ipsi te moriente vixerunt: obsecro Domine, ut ego te uiuente non moriar.

Ezech. 18.

Sap. 3.

Et quis bone Iesu unquam de tua misericordia diffidat? Quoniam cum inimici essemus, redemisti nos in sanguine tuo, & reconciliasti nos Deo. Ecce sub tua misericordia umbra protectus, ad thronum gratiae veniam postulans curro: clamans & pulsans, donec miserearis mei. Si enim ad veniam nos vocasti non quarentes,

Rom. 5.

Hebr. 4.

Pfal. 122.

Matt. 11.

quanto

quanto magis veniam impetrabimus postulantes?

Ne memineris dulcissime Iesu tua iustitia aduersus peccatorem tuum: sed esto memor benignitatis tuae aduersus creaturam tuam. Ne memineris ire aduersus reum: sed memor esto miserationis tuae aduersus miserum. Obluiscere superbum pronocantem: & respice miserum inuocantem: *Quid enim est IESVS, nisi Saluator?* Matt. 1.  
Ergo Iesu per te ipsum exurge in adiutorium mihi: *dic anima mea, Salus tua ego sum.* Psal. 34.

Manus tuae Domine fecerunt me, & plasmauerunt me: manus utiq. illa quae affixe sunt clauis pro me. Opus manuum tuarum Domine ne despicias: & vulnera manuum tuarum precor aspicias. Ecce in manibus tuis descripti me: lege ipsam scripturam, & salua me. Soliloq. c. 2. Esa. 49.

En ad te suspiro creatura tua: Creator es, recrea me. Ad te clamo factura tua: Vita es, viuifica me. Ad te respicio tuum plasma: Plasmator es, restaura me.

Parce mihi Domine: nihil enim sunt dies mei. *Quid est homo, ut possit alloqui Deum factorem suum? Parce mihi. Aegrotus sum, ad medicum clamo: cecus sum, ad lucem propero: mortuus sum, ad vitam suspiro. Tu es Medicus, tu Lux, tu Vita Iesu Nazarene: miserere mei fili David: miserere mei fons misericordiae. Audi, qui ad te clamat, infirmum: Lux qua transis, expecta cecum: prebe ei manum, ut ad te veniat, & in lumine tuo videat lumen. Amen.* Iob 7. Luc 18.

Respice me Domine Iesu, & miserere mei: quia dolores cordis mei multiplicati sunt. Da mihi consolationem tuam caelestem: & noli spernere peccatricem animam, pro qua mortuus es. Meditat. cap. 16.

Alia

Alia Precatio, homini in periculo mortis constituto, & intra conscientiam suam anxio: veniamq; peccatorum humiliter flagitanti, & ad Dei misericordiam prouocanti, recitanda.

## CAPVT

X.

Thomas  
Kemp.  
Lucz 15.

**D**omine Deus, sancte pater, peccavi in calum & coram te: & nō sum dignus vocari filius tuus. Sed pater mi, fac me sicut unum de mercenariis tuis. Iuste agis, si prouocis me à facie tua: sed misericorditer facis, indignum omni beneficio recipiendo. In hac confisus misericordia, procido ad pedes tuos, lachrymas fundo, vestigia tua adoro & osculor, te deprecans humili & contrito corde. Respice misericors Deus super canē mortuum, & pulicem unum. Pretende misericordiam tuā scientibus te: da dexteram tuā profugo seruo tuo. Ne irasca- ris Domine Deus in perpetuum, super malignitate serui tui: sed vniuersę multitudinis misericordia à seculo recorderis, & sis placabilis super seruum tuum. Exaudi Dñe hanc petitionem meā, quam fundit seruus tuus coram te, genua flectens ante omnipotentiam tuam: adorans super terram vultum glorię tuę: quia stultē egi, & insipienter nimis, multoties offendens Maiestatem tuam: non veritus thronum regni tui. Dimitte obsecro omnem noxam seruo tuo, & ne deleas nomen meum de libro viuentium: sed in electorum tuorum numero me scribere digneris: vt inueniar in gloriam & laudem nominis tui. Amen.

Dan. 3.  
1. Reg. 24.  
Psal. 35.

Psal. 24.

Alia, eiusdem generis.

## CAPVT

XI.

**R**ex mitissime, qui per Ezechielem prophetam asse- ris, te nolle mortem peccatoris, sed vt conuertatur & viuat: miserere mei, in summa miseria te misericordie fontem imploratis. Multa sunt peccata mea fateor, sed

sed cum apud te sit misericordia & copiosa redemptio,  
non spernas deprecationem pauperis: ad te velut agro-  
tus ad medicum suspiro, misericordiam implorans, ac  
pro peccatis veniam postulans. Sana me Domine, & sa-  
nabor. Serua hac pacta, quae promissisti, inuiolata. Dixi-  
sti enim: Ecce dies veniunt, & seruiam domui Israel &  
domui Iuda foedus nouum: PROPITIABOR INIQVITA-  
TI EORVM, & PECCATI EORVM NON MEMORA-  
BOR AMPLIUS. Exaudi poenitentem: quem ut respi-  
sceret, misericorditer expectasti. Ne intres in iudi-  
cium cum seruo tuo: sed de morte fac transire ad im-  
mortalitatis gloriam. Per Iesum Christum filium tuum  
D. N. Amen.

Exercitium, quo aegrotus suspiriis & gemitibus  
(quando aliud vix potest) Deo se resignet, at-  
que ut eidem coniungatur, feruenter desideret.  
Auctore Ioan. Lantspergio Carthuf.

**O** Amator fidelissime, misericordissime Domine Ie- **CAPVT**  
su Christe, da mihi ut ex corde & animo sentiam **XII.**  
quod dico: Quemadmodum desiderat cervinus ad fontes **Psal. 41.**  
aquarum: ita desiderat anima mea ad te Deus. Elegi **Psal. 83.**  
tabernaculis peccatorum. Beati qui habitant in domo **Psal. 41.**  
tua Domine: in secula seculorum laudabunt te. Sitinit  
anima mea ad te Deus: quando veniam & apparebo  
ante faciem tuam? Quare tristis es anima mea, & quare  
conturbas me? Spera in Deo, quoniam adhuc confitebor  
tibi: salutare vultus mei & Deus meus. **Psal. 30.**  
Illustra faciem tuam super seruum tuum: saluum me  
fac in misericordia tua. Domine non confundar, quo-  
niam inuocaui te. Deus ne elongeris a me: Deus meus **Psal. 70.**  
auxilium meum respice. Tibi derelictus est pauper:  
orphano

Pfal. 9.  
Pfal. 31.

Pfal. 37.  
Pfal. 30.

Pfal. 26.

orphano tu eris adiutor. Tu es refugium meum à tribulatione qua circumdedit me: exultatio mea, erue me à circumdantibus me. Intende in adiutorium meum, Domine Deus salutis meae. Quoniam fortitudo mea, & refugium meum es tu: adiutor meus & protector meus. Ne igitur derelinquas me: neque despicias me Deus salutaris meus.

Pfal. 32. 118.  
Ezech. 18. 33

Ecce venio ad te, quæ despexi & offendi, Deus meus: quia misericordia tua plena est omnis terra. Ad misericordissimum igitur te Patrem confugio. Suscipe me secundum eloquium tuum, (quo dicit: Nolo mortem peccatoris) & vitam: & nō confundas me ab expectatione mea.

Pro vita mea temporali non rogo Deus meus: sed te, qui es Vita aeterna, in animā meā inuoco. Heu Domine Deus, quod unquam te offendi: quod tuas inspirationes & monita neglexi: quod unquam aliud præter te, aut extra te amavi: pro hoc doleo Dñe Deus. Atq. utinam des mihi, ut ex toto corde meo doleam: & luceā per omnia momenta vite meae. Utinam omnes sanguinis mei guttas cum lachrymis præ dolore & amore in suavissimum cor tuum tibi fundere & offerre possim.

Matt. 20.

Dulcis Iesu, neque vitam neque mortem, sed tuum beneplacitum desidero & expecto: fiat mihi secundum voluntatem tuam. Si vis ut moriar, dulcis Iesu, suscipe spiritum meum: & licet ad vesperam venerim, omnium nouissimus, da mihi ut tecum, et in te, requiem accipiam sempiternam. Si verò vis ut diutius vitam, dulcis Iesu, hoc propono, & pro hoc gratia tua suffragium rogo, reliquā vitam meam corrigere, atq. in holocaustū tibi totū offerre, in gloriam tuam, & secundū beneplacitū tuum.

O desiderabilissime Iesu, quia vitam meam in peccatis consumpsi, ad contumeliam nominis tui gloriosi, nec tibi hæcenus seruire cœpi: da mihi, ut vel nunc perfecte incipiam.



incipiam: & omnes vires anime & corporis mei, omnemque residuum tempus mihi abs te concedendum, in gloriam & secundum optimam ac perfectissimam voluntatem tuam expendam.

Misericordissime Iesu, adesto mihi propitijs in his penis ac miserijs, quibus teneor: & si qua grauiora & grauissima commeri peccatis meis: fac ut patientissime tolerem. Dulcis Iesu, si nihil unquam deliquissem, aut nihil mali apud te commeruissem, nihilominus ad gloriam tuam, & in tui amorem ac beneplacitum, in has et in quaslibet alias penas me tibi pro tua voluntate offero atq. resigno: non in mea virtute, sed in misericordiarum tuarum multitudi- ne, quibus innitor, & quas inuoco: ut fragilitatem carnis mee pusillanimitatemque spiritus mei tua virtute erigas, longanimitate confortes, ac patientia robores: ut nulla aduersitate aut tentatione victus succumbam, nulla pusillanimitate deficiam: sed amoris tui incendio absorptus, ad te solum suspirẽ, ad te sitienti corde anhelem, te solum cogitem, te solum desiderem: & mundum cum vniuersis qua in eo sunt relinquam, fastidiam & contemnam. Tibi verò pro omnibus, & latis & tristibus, ex toto corde gratias agam. Amen.

MEDITATIONES. IN PASSIONEM D. N. IESU CHRISTI, EX S. Scripturæ, & S. Patrum sententijs contextæ: cum adiunctis Precatiunculis, ad iuuandum ægrotum accommodatis.

DE TRISTITIA ET PAVORE CHRISTI, IN HORTO EXISTENTIS.

Ethymno dicto, egressus est Iesus cum discipulis suis trans torrentem Cedron: & venit in villam  
 6 quæ

quæ dicitur Gethsemani, ubi erat hortus: & dixit discipulis suis: Sedete hîc, donec vadam illuc & orem. Et assumpto Petro & duobus filiis Zebedæi, cœpit contristari & mœstus esse. Tunc ait illis: Tristis est anima mea usque ad mortem. Sustinete hîc, & vigilate mecum. Et progressus pusillum, procidit in faciem suam orans & dicens: Pater mi, si possibile est, transeat à me calix iste: veruntamen non sicut ego volo, sed sicut tu. Matth. 26, Ioan. 18.

## MEDITATIO.

CAPVT  
XIII.

**Q**uis non timeat, ô Dñe Iesu, si times tu, quæ omnia timet: si expanescis tu, cui omne genu curuatur: si tu, qui mors es mortis, morte propinquate pertimescis? Sed metus ille infirmitatis humana communem exprimebat affectum: & significabat hanc poenam vniuersa successioni Adam sine exceptione impositam, vt difficultas extremi transitus timeretur. Positis autem in terragembus, procidisti in faciem tuam, orans in agonia, & dicens: Mi pater, si possibile est, transeat à me calix iste. Et angustias quidem cordis tui certissime indicabat sudor ille sanguineus, qui orationis tempore de carne tua sanctissima guttatim decurrebat in terram. Dominator Domine Iesu, unde tam anxia hæc supplicatio? Nonne voluntarie omnino patri sacrificium obtulisti? Vtique Domine. Arbitramur autem quod hoc ad consolationem infirmorum membrorum tuorum assumpsisti: ne forte desperet quis, si caro infirma remurmuret, ubi ad passionem promptus est spiritus. Da mihi, bone Iesu, omnem mœstitudinem atque agritudinē meam in tua vincere: omnem quoque angorem & dolorem patienter pro tui nominis gloria perferre: propter te, qui dilexisti me, & tradidisti temetipsum pro me. *Præsto sum. Domine, fias*

Rom. 8.  
Gal. 2.

fit quod bonum est coram te: veruntamen ne discesse-  
 ra a me. 2. Reg. 15.  
Psal. 37.

DE AGONIA CHRISTI IN HOR-  
 TO, ET SANGVINEO EIVS SVDORE.

Apparuit autem illi Angelus de cælo confortans  
 eum. Et factus in agonia prolixius orabat. Et fa-  
 ctus est sudor eius sicut guttæ sanguinis decur-  
 rentis in terram. Lucae 22.

MEDITATIO.

**V**T cunctis seculis declarares, Domine Iesu, te ve-  
 rè pro nobis doluisse, acerbissimamq; passionem  
 subisse: concepta animo supplicij atrocitate, impensiq;  
 beneficij apud homines ingratitude & oblivione, tanto  
 horrore concussus es, ut affectus sanguineum sudorẽ ex-  
 presserit, toto corpore confertim atque effusè promanan-  
 tem: & Angelus tuus, creatura tua, minister tuus, te  
 Creatorem Deum ac Dominum suum confortauerit.  
 Quis verò cuicumque etiam supplicio expositus, sangui-  
 nem legitur unquam sudasse? Nec mirum. Nullius  
 enim supplicij tanta unquam fuit, aut futura est acerbis-  
 tas, quanta amarissima tua passionis: cuius solius cogita-  
 tio sudorem expressit sanguineum. Adfers autem ad ca-  
 sus humanos exemplum: ut me sortis extrema homu-  
 lum, pigrum & ignaum, non pigeat propter te Deum  
 & Dominum meum aliquid tolerare, cum tu filius &  
 natura heres, insons, inculpabilis, tanta perpeffus  
 sis, dum patri obedis. Obsecro Domine, non pereat mihi  
 tanti prety medicina. Succurre mihi in his meis angu-  
 stis, in Conscientia pauore à facie iudicij tui. Nam an- Psal. 54. 143  
 gustatus est in me spiritus meus: in me turbatum est cor  
 meum. Et anima mea turbata est valde. Quid dicam?  
 IESV SALVATOR mundi saluifica me ex hac hora.

Exod. 23.

Mitte angelum tuum, qui custodiat me: & introducat in locum, quem preparasti expectantibus te. Amen.

## DE PRODITIONE IVDÆ.

Et dicit discipulis suis: Ecce appropinquavit hora, & filius hominis tradetur in manus peccatorum. Surgite, eamus: ecce appropinquavit, qui me tradet. Adhuc eo loquente, ecce Iudas vnus de duodecim venit, & cum eo turba multa cū gladiis & fustibus. Qui autē tradidit eū, dedit illis signum dicens: Quemcunq. osculatus fuero, ipse est, tenete eum. Et confestim accedens ad Iesum, dixit, Ave Rabbi. Et osculatus est eum. Dixitque illi Iesus: Amice ad quid venisti? Matthæi 26.

## MEDITATIO.

**Q**Vam promptus, Domine Iesu, fuerit spiritus, euidenter ostendisti, quando venientibus vnā cum proditore tuo viris sanguinum & querentibus animam tuam, cum laternis & facibus & armis per noctem, vltro occurristi, & te ipsum manifestaſti. Nam accedentem ad osculum sanctissimi oris tui, trucem bestia non auersatus es: sed os in quo dolus non fuit inuentus, ori quod abundauit malitia, dulciter applicuisti. Et amantis planè affectu eum corripuisti: cum tamen ille amoris pignore vulnus infligeret, charitatis officio sanguinem funderet, & pacis instrumento mortem irrogaret: seruus Domino, discipulus Magistro: at tu amoris officia non negaſti. Ego quoque bone Iesu, quem in numerum amicorum & domesticorum tuorum assumere dignatus es: quoties te offendi, ac peccatis meis tanquam osculo perfido tradidi? Nam & ego, vt in manus impiorum deuenires, non minima causa extiti. Traditus es enim propter delicta nostra. Sed nunc Iesu pie, procido ad pe-

Esa. 53.  
Psal. 49.Ioan. 15.  
Psal. 54.

Rom. 4.

ad pedes tuos, præoccupo faciem tuam in confessione: re-  
 cepe me cum filio perduto in gratiam tuam. Non ausim  
 petere, ut ad osculum me admittas, seruum omni suppli-  
 cio dignum: sed oro, ut me inter electos minimos habere  
 digneris. Amen.

Psal. 94.  
 Luc. 15.

## DE CAPTIONE IESU.

Tunc accesserunt, & manus iniecerunt in Iesum: &  
 tenuerunt eum. Matthæi 26.

## MEDITATIO.

**N**on à te absternuit impios Domine Iesu, quòd in  
 hora apprehensionis tua, omnipotenti brachio tuo  
 terra eos altifisti: non quidem defensionis causa, sed ut  
 cognosceret humana presumptio, nihil se posse aduersum  
 te, nisi quantum permitteretur à te. Et quis audiat sine  
 gemitu, qualiter homicidas man<sup>u</sup> in illa hora in te ini-  
 cerunt: innocetes manus tuas Iesu bone, vinculis astrin-  
 gentes, te agnum mansuetum nihil loquentem, ad instar  
 latronis contumeliose traxerunt ad victimam? Et nec  
 tunc misericordiam effundere super inimicos tuos, & di-  
 stillare fruum dulcedinis tuae Christe cessasti: & tãgens  
 auriculam vulnerati, sanasti eum. Operatorem sum  
 limus agnoscit, & operatricem Domini manũ sequitur  
 caro: sed impij illi nec intellexerunt infelices mysterium,  
 nec venerati sunt tam clemente pietatis affectum: quòd  
 stium hostes tuos non passus sis vulnerari: Illi mortem  
 tibi inferebant: persecutorum vulnera tu sanabas. Rum-  
 pe bone Iesu, funes peccatorum, qui circumplexi sunt  
 me: ut securus decantem, dirupisti vincula mea Domi-  
 ne: tibi sacrificabo hostiam laudis. Medere quoq; vul-  
 neribus animæ meæ: sana animam meam, quia peccaui  
 tibi. Saluum me fac, & saluus ero: quoniam laus mea  
 tu es. Amen.

Ioan. 18.

Luc. 22.

Psal. 118.

Psal. 115.

Psal. 40.

## DE FUGA DISCIPULORVM.

Tunc discipuli omnes relicto eo fugerunt. Mat. 26.

## MEDITATIO.

Ioan. 13.

Psal. 87.

Psal. 78.

Psal. 37.

**N**ec minus animum tuum afflixit discipulorum tuorum fuga: quos tu tamen vsque in finem dilexisti. Quippe impleri oportuit in te, quod antè propheta David in persona tua gemens & plangens dixerat: *Elongasti a me amicum & proximum: & notos meos à miseria. Opprobrium sustinuit cor meum & miseriam: & sustinui qui simul contristaretur, & non fuit: consolantem, & non inueni. Domine Iesu, ante te omne desiderium meum: & gemitus meus à te non est absconditus. Cor meum conturbatum est in me: dereliquit me virtus mea. Ne derelinquas me Domine Deus meus: ne discesseris à me. Intende in adiutorium meum, Domine Deus salutis mee. Amen.*

## DE PRÆSENTATIONE IESU CORAM ANNA ET CAIPHA PONTIFICIBVS.

Et adduxerunt Iesum ad Annam primum. Et misit eum Annas ligatum ad Caipham pontificem, Principes autem sacerdotum, & omne cõcilium querebant falsum testimonium contra Iesum, vt eum morti traderent: & non inuenerunt, cum multi falsi testes accessissent. Et exurgens summus sacerdos in medium, interrogabat eum: & dixit ei: Tu es Christus filius Dei benedicti? Iesus autem dixit illi: Ego sum, & videbitis filium hominis sedentem à dextris virtutis Dei, & venientem cum nubibus cæli. Summus autè sacerdos scindens vestimenta sua, ait: Quid adhuc desideramus testes? Audistis blasphemiam. quid vobis videtur? Qui omnes, condemnauerunt eum  
scum ef.

reum esse mortis. Et viri qui tenebant illum, il-  
ludabant ei. Et cœperunt quidā conspuere eum,  
& velare faciem eius, & colaphis eum cœdere, &  
dicere ei, Prophetiza nobis Christe: quis est qui  
te percussit? Et ministri alapis eum cœdebant.  
Matti. 26. Mar. 14. Luc. 22. Ioan. 18.

## MEDITATIO.

**C**ircumdede runt te Domine Iesu canes multi: &  
Captum atque ligatum ducunt ac reducunt. At tu  
Domine, non resistis dum caperis: non murmuras dum  
hæris: non recalcitras cum duceris: non maledicis  
dum traheris: sed vadis ut mansuetus: taces ut agnus:  
sequeris ut innocens: pateris ut humilis. Amantissime  
Domine, quanta indigna a propria gente pertulisti!  
Vultum tuum desiderabilem, in quem desiderant ange-  
li prospicere: qui omnes celos adimplet lætitia: pollutus  
labus spūto coinquinauerunt: sacrilegis manibus suis  
cecidit: velo in derisum operuerunt: & te Dominum  
vniuersa creatura, tanquam seruum contemptibilem  
colaphizauerunt. At tu voluntarie, ut nos sanares, Esa. 50.  
corpus tuum dedisti percutientibus, & genas tuas vel-  
lentibus. Faciem tuam non auertisti ab increpantibus  
& conspuentibus in te. Et ego Domine Iesu, faciem tuam  
non erubui: non sum veritus Maiestatem tuam: satura-  
ui te opprobriis. Sed inuoco nunc nomen tuum Domine: Thren. 3.  
ne sis mihi inexorabilis. Miserere mei, secundū multi-  
tudinem miserationum tuarum. Amen. Psal. 50.

## DE NEGATIONE PETRI.

Petrus verò sedebat foris in atrio. Quem cum vi-  
disset ancilla quædam sedentem ad lumen, &  
eum fuisset intuita, dixit: Et hic cum illo erat.  
At ille negauit eum, dicens, Mulier non noui il-  
lum. Et

b \*

lum. Et

lum. Et post pusillum, alius videns eum, dixit: Et tu de illis es. Petrus verò ait, O homo, non sum. Et intervallo factò, quasi horæ unius, alius quidam affirmabat, dicens: Verè & hic cum illo erat: nam & Galilæus est. Et ait Petrus, Homo nescio quid dicis. Et cōtinuò adhuc illo loquente cantavit gallus. Et conuersus Dominus respexit Petrum. Et recordatus est Petrus verbi Domini, sicut dixerat, Quia priusquam gallus cantet, ter me negabis. Et egressus foras Petrus fleuit amarè. Matthæi 26. Lucæ 22.

## MEDITATIO.

**Q**uam facile firmissima illa columna ad unius aura impulsam contremuit, ac tandem corruit. Vah, cecidit angelus in celo, Adam in paradiso, Petrus in mundo: quis non timeat iudicia tua Dñe Deus omnipotens, Rex seculorum? Tanquam momentū statera, sic est ante te orbis terrarum: & tanquam gutta roris antelucani, qui descendit in terram. Sed miseris omnium quia omnia potes: & dissimulas peccata hominum propter penitentiā. Diligis enim omnia quæ sunt: & nihil odisti eorum quæ fecisti. Propterea conuersus respexisti discipulum tuum, vt eum ad penitentiam prouocares. Vnde & ille recordatus verbi tui, egressus foras fleuit amarè. Illis, quæso, bone Iesu, tuæ pietatis oculis, quibus tunc Petrum respexisti, me miserū quoque peccatorem elementer adspicias: vt exitus aquarum deducant oculi mei. Ne auertas faciem tuam a puero tuo. saluum me fac in misericordia tua. Respice in me, & miserere mei. Amen.

Apoc. 19.  
Sap. 11.

Psal. 118.  
Psal. 68.  
Psal. 10.  
Psal. 24.

DE PRÆ-



DE PRÆSENTATIONE IESV CO-  
RAM PILATO: DEQVE ILLVSIONE  
EIVS AC FLAGELLATIONE.

Manè autem factò, consilium inierunt principes sacerdotum aduersus Iesum, vt eum morti traderent. Et vinctum adduxerunt & tradiderunt Pontio Pilato præfidi. Tunc milites præfidis suscipientes Iesum in pratorio, congregauerunt ad eum vniuersam cohortem. Et apprehendit Pilatus Iesum, & flagellauit. Matth. 27. Ioan. 19.

## MEDITATIO.

**A**d huc autem animam tuam, Domine Iesu, incircumcisa carni deglutendam tradiderunt. Vinctum siquidem ante faciem Pilati perduxerunt, postulantes crucis supplicio te interimere, qui peccatum non noceras: & verum homicidam dari sibi, agnum lupo, aurum luto postponentes. Et quidem non ignorabat impius ille, per inuidiam hæc in te fieri, nec tamen abstinnit a te temerarias manus: replevit amaritudine animam tuam sine causa. Illusum recepit: in conspectu illuorum astringere te iussit: nec pepercit amarissimis verberibus virginæam carnem tuam diuellere: plagis plagas, liuores liuoribus crudeliter infligere. Electe puer Dei mei: quid tanta amaritudine, quid tanta confusione dignum commiseras? Prorsus nihil. Ego, ego homo perditus, totius perditionis tuæ causa extiti. Ego Domine vnam acerbam comedi, & dentes tui obstupuerunt: quia que nõ rapuisti, tunc exoluebas. Posuit in te Deus iniquitatem omnium nostrum: tu vulneratus propter iniquitates nostras, attritus es propter scelera nostra. Disciplina pacis nostræ super te. Bone Iesu, da mihi liuore tuo sanari. Amen.

Esa. 53.  
2. Cor. 5.

Esa. 42.  
Matth. 12.

Ezech. 18.  
Psal. 68.

Esa. 53.

## DE CORONATIONE IESV.

Et milites plectentes coronam de spinis, imposuerunt capiti eius: & velle purpurea circumdederunt eum, & arundinem in dextera eius. Et veniebant ad eum, & dicebāt: Ave Rex Iudæorum. & dabant ei alapas. Et expuentes in eum acceperunt arundinem, & percutiebant caput eius. Exiit ergo Iesus foras, portans coronam spineam, & purpureum vestimētum. Et dicit Pilatus Iudæis, Ecce homo. Matth. 27. Ioan. 19.

## MEDITATIO.

**E**Xpergiscere anima mea, & contemplare virū hunc memorabilem: quem in speculo Evangelici sermonis quasi præsentem intueris. Quis est iste qui ingreditur habens imaginem quasi Regis, & nihilominus serui despectissimi confusione repletus? Coronatus incedit: sed ipsa etiam corona cruciatus est illi, & mille puncturis caput eius diuulnerat. Regali purpura induitur: sed potius in ea despicitur quam honoratur. Sceptrum in manu gestat: sed eo ipso caput eius reuerendum feritur. Adorant coram ipso positus in terra genibus, & Regem clamant: & continuo spiritus amabiles eius genas sublinunt: adeo ut non fuerit species ei neque decor: & quasi absconditus vultus eius & despectus. Edomā bone Iesu, inuincibilem cordis mei duritiam, & confirmā imbecillitatem meam: ut non pigeat tecum quiduis pati, ut tribulationis socius, tua quoque consolatione gaudeā. Amen.

Et. 11.

## DE EDUCTIONE IESV AD LOCUM CALVARIÆ.

Tunc Pilatus dimisit illis Barabbam: Iesum autem flagellatum tradidit eis, ut crucifigeretur. Et postquam

quàm illuserunt ei, exuerunt eum chlamydem:  
& induerunt eum vestimentis eius, & duxerunt  
eum vt crucifigerent. Et Iesus baiulans sibi cru-  
cem, exiuit in eum qui dicitur Caluariæ locum.  
Matthæi 27. Ioan. 19.

## MEDITATIO.

**G**Rande spectaculum, & mundo & angelis, Domi-  
ne Deus meus. Inter sputamenta & colaphos, &  
reliqua ludibria, patientia & mansuetudine vesanas  
mentes conturbas: & in eo, quòd inter iniurias & conui-  
cia se malitia Iudaica sentit contemptam, vehementius  
exacerbatur: & de malitia & impietate suauitas pie-  
tasq; tua Christe triumphat. Et quidem vt filius homi-  
nis, sicut scriptum est de te, vadis: qui damnatus es, vt  
liberares danatos: doluisti, vt sanares infirmos: timui-  
sti, vt nos faceres securos: opprobria pertulisti, vt im- psal. 40.  
properia detrahentium non mouerent electos. Domine  
Iesu, qui infamem arborem crucis, defectis iam nimia  
vexatione viribus, ad supplicij locum oppido volens por-  
taisti: & sub onere crucis dorsum incuruans, nostra ipse  
portare dignatus es ignominia: fac me tollere crucem  
meam, & sequi te, vt te dignus inueniar: vt commoriar  
simul tibi, & conuiuam: sustineam & conregnè. Amen.

## DE CRUCIFIXIONE IESU.

Et postquàm venerunt in locum, qui vocatur Cal-  
uariæ, ibi crucifixerunt eum: & duos alios la-  
trones, hinc & hinc, medium autem Iesum. Præ-  
tereuntes autem blasphemabant eum.

Matt. 27. Lucæ 23. Ioan. 19.

MEDI-

## MEDITATIO.

**Q**uid te abiectius Dñe Iesu, vermis potius quam homo? Qui nudus & verberibus laceratus in medio latronum cruci ignominiose ferreis clavis affigi, sanctissimosque artus tuos valide distendi spontaneus tolerasti: peccata nostra perferens in corpore tuo. Facies illa tua sacratissima, quam angeli aspicere desiderant, qua fuerat in transfiguratione rutilans ut sol, modo denigrata est, alapis & liuore saucia: sputo, puluere, lachrymis, ac sanguine conspersa. Ibi eras tu Domine comitatus discipulis, quos elegeras: hic ab illis derelictus. Ibi fuisti in medio duorum illustrium virorum collocatus, Mose & Elia: hic inter duos latrones constitutus. Ibi exultans gloria: hic repletus ignominia. Ibi eras amictu fulgente & candicante ornatu: hic vestimentis tuis nudatus & spoliatus. Ibi audisti suauissimam patris vocem, te filium dilectum vocantem: hic audis impropria, & perditorum hominum cateruam te blasphemantem. Presta quaeso bone Iesu, ut mortem tuam in mente habeam: ac lubens tua sequar vestigia. Me quoque fac dulcissime Iesu, in suauissimos istos tuos, dissipatis in cruce manibus, amplexus feliciter aspirare: ut in te uno, tibiq; vni vna, imò amoris tuo immoriar: ne quæ fiat, ut abs te unquam diuellar. Amen.

MEDITATIONES ET PRECATIONES. AD SEPTEM VLTIMA  
Christi Iesu in cruce morientis Verba.

## VERBUM I.

Erat autem hora tertia, & crucifixerunt Iesum. Et cum eo crucifigant duos latrones: vnum à dextris, & alium à sinistris eius. Et impleta est Scriptura quæ dicit: Et cum iniquis reputatus est. Et  
præter-

1. Pet. 2.

Matt. 17.

Luc. 9.

prætereuntes blasphemabant eum, mouentes capita sua. Iesus autem dicebat: PATER, DIMITTE ILLIS: NON ENIM SCIUNT QUID FACIUNT. Mar. 15. Lucæ 23.

## MEDITATIO.

CAPVT  
XIII.

**A**scēdisti Dñe Iesu palmam: quia illud crucis tuæ lignū protendebat triumphū de principatibus & potestatibus, & nequitiis spiritualib. victoriam. Tu ipse patibuli tui bamlus, habebas ligno quod tuleras: euectionis & passionis anxietates sustinēs & labores. Clavis sacros pedes terebrantibus, fossisq̄ue manibus, de vulnerū anxietate nō loqueris: de spinis sacrū caput pūgentibus nō quereris: sed sacerdotalis auctoritatis privilegiū in mediū proferens Mediator inter nos & patrē, oras pro his qui ad dolorem vulnerum tuorū opprobria addiderunt: & pro inimicis impetras veniam. Supplicas & obsecras, ut hac eis iniquitas dimittatur: & a morte tua habeantur innoxij ipsi qui sanguinem tuum super se, & super filios suos manere precantur. Mira res. Tu clamas, IGNOSCE: Iudæi, CRUCIFIGE. Quomodo potabis Domine desiderantes te torrente voluptatis tuæ: qui sic perfundis crucifigentes te oleo misericordie tuæ? Ioan. 15. Maiorem charitatem nemo habet, quam ut animam suam ponat quis pro amicis suis: tu maiorem habuisti Domine, ponens eam etiam pro inimicis. Rom. 5. Cum enim adhuc inimici essemus, per mortem tuam & tibi recōciliati sumus & patri. Vix pro iusto quis moritur, tu pro impiis passus es: moriens propter delicta nostra: qui venisti iustificare gratis peccatores: seruos facere fratres: captiuos cohæredes: exules reges. Nec sanè aliud aliquid patientiam hanc & humilitatem æquè illustrat, quam quod tradidisti in mortem animā tuam, et peccata multorum tulisti: etiam pro transgressoribus orans, ut non periret. Esa. 53.

## PRECATIO

## PRECATIO.

Math. 9.

1. Tim. 1.

**P**Recor te clementissime Iesu, ut qui pro inimicis tuis ex maximo Charitatis affectu, dignatus es orare: pro me quoque miserrimo peccatore patrem tuum rogare digneris, ut omnia peccata mea indulgeat, & a penis quas pro his merui, clementer absoluat. Da bona & firmam fiduciam de tua pietate concipere: ac fideli mēte sepe cogitare, quia pro peccatoribus saluandis venisti in hunc mundum: & pro impiis voluisti pati & mori. Proficiat ergo salutē anime meae tua sanctissima Precatio, in cruce pro inimicis effusa: & peccatorum meorum mihi per eam spem venia concede: ut quod meritis meis assequi non valeo, hoc tua sanctissima intercessione efficaciter obtineam. Expande quaeſo latissime ramos brachiorum tuorum super me: ut non metuat nec desperet inops & dolens anima mea: & suscipe me miserum peccatorem, nil de propriis actibus, sed de tua miseratione confidentem. Amen.

## VERBUM II.

Alter de his qui pendebant latronibus, dicebat ad Iesum: Domine memento mei, dum veneris in regnum tuū. Et dixit illi Iesus: AMEN DICO TIBI, HODIE MECVM ERIS IN PARADISO. LUCÆ 23.

## MEDITATIO.

**V**ix Domine Iesu, primum hoc Verbum, PATER IGNOSCE ILLIS, expleueras, & ecce iam fructum afferebat: et quasi inter serentis manus vinificiū illud semē ante maturuit, quam germinare visum fuit in terra. Latronum enim alter à dextris pendens auido corde Verbum tuum excipiens, statim non tantum indulgentiam meruit, sed tuus Christie familiaris effectus, praemissus est in paradisum: & factus est particeps regni, per confessionem factus collega martyrii. Plus ergo impetrauit

petrauit, quàm orauit. Domine, inquit, memento mei. Non audeo maiora petere. Peccator sum, indignus plane misericordia tua: tantùm memento mei, cùm veneris in regnum tuum. Et tu misericors & miserator Domine, mox exaudisti de cruce compunctum corde, dicens: Hodie mecùm eris in paradiso. Memoria memor ero tui, P<sup>sal.</sup> 138. & benedicam tibi: in memoria eterna eris, & ab auditu malo non timebis. Et ne unquam memoria excidas, mecùm eris: & super te oculi mei. Mecùm eris, à timore liber. gaudiis redundās in pace & securitate sempiterna. Tu eris Exemplũ & speculũ Misericordie meae, in quo oēs peccatis grauati videbũt, quòd maior est Misericordia mea, quàm humana peruersitas: quia nolo mortẽ peccatoris, sed vt conuertatur et uiuat. Ex te discet, quòd paruis & magnis, paucis ac plurimis noxis, ex aquo ignoscã: quia Miserationes meae super omnia opera mea. P<sup>sal.</sup> 144.

## PRECATIO.

**T**Ribularer valde propter peccata mea plurima, si nescirem misericordias tuas Domine: si Exempla penitentium à te benignissimè receptorũ non audissem. Tu per temetipsum dixisti: Sic Deus dilexit mundum, Ioan. 3. vt filium suum unigenitum daret: vt omnis qui credit in eum, non pereat, sed habeat uitã eternam. Et iterum: Non veni vocare iustos, sed peccatores. Tu Petrũ post fœdam negationem amarè stentem, in gratiam deuuo recepisti: Tu Magdalena ad pedes tuos pronoluta peccata misericorditer remisisti. Tu variis languoribus comprehensõs, ope Misericordie tue sanasti: & grauioribus peccatis inuolutos, largiori pietatis munere liberaisti. O P<sup>sal.</sup> 148. benignissime Iesu, misericordia mea & refugium meum & liberator meus: ne pratercas animam hanc meam, quam ipse finxisti: dignerisq; oculos misericordie tue in me miserrimum peccatorem deflectere, quibus latronem in cruce respexisti. Memento verbi tui sancti, quod la- P<sup>sal.</sup> 118.

troni dixisti, in quo & mihi spem dedisti: Dic anima mea Saluator vite mea, cum appropinquauerit tempus resolutionis mee: Hodie mecum eris in paradiso. Memento mei in Regno tuo: & cum defecerit virtus mea, Domine ne derelinquas me. Amen.

Psal. 70.

## VERBUM III.

Stabat autem iuxta crucem Iesu mater eius. Cum vidisset ergo Iesus matrem, & discipulum stantem, quem diligebat, dicit matri suae: MULIER, ECCE FILIVS TVVS. Deinde dicit discipulo: ECCE MATER TVA. Ioan. 19.

## MEDITATIO.

**F**ugientibus, Domine Iesu, Apostolis, ante crucem stabat mater tua, & piis spectabat oculis tua filij sui vulnera: pro qua tu sollicitus, in summis licet doloribus, humanissime eam compellas, dicens: Mulier, ecce filius tuus: & ad discipulum, Ecce mater tua. Sic decebat, ut mater sancta & virgo illibata fideli ministro non careret: ne velut derelicta, & inter Iudaeos videretur extranea, qua ilico tua dulcissima praesentia erat orbanda.

## PREGATIO.

**P**issime Iesu, intueri me illis Pietatis tuae oculis, quibus matrem & discipulum sub cruce stantes respexisti: quando alteram alteri commendasti. Visita me obsecro in salutari tuo: ut Crucis tuae trunco adhaeream, nec a te fidei oculos dimoveam. Mihi enim omnino adherere tibi bonum est, o caput gloriosum & benedictum in secula. Sequar te quocumque volueris: nec auellar a te. Tu dolores meos portas, & pro me doles: tu primis transis per angustum passionis foramen, ut latum praebeas sequentibus membris ingressum. Tibi subiecta sit anima mea: abs te enim salutare meum. Nam & tu Deus meus, &

Psal. 61.

saluta



salutaris meus: susceptor meus, non mouebor amplius. In  
salutare meum & gloria mea: Deus auxilij mei, &  
spes mea in te Iesu Deo meo est.

## VERBYM IIIII.

Et circa horam nonam clamauit Iesus voce magna,  
dicens: ELI, ELI, LAMMASABACTANI? hoc est,  
DEVS MEVS, DEVS MEVS, VT QUID DERELI-  
QVISTI ME? Matth. 27.

## MEDITATIO.

Considero nunc opera tua Domine Iesu, & admi-  
ror te cruci inter damnatos affixum, iam nec tri-  
stem nec pauidum, sed suppliciorum victorem, eleuatis  
manibus triumphantem de Amelech, & quasi sanctifi-  
cantem de excelso plebem: & eleuatum in sublimi, & Exod. 17.  
quasi calo proximum, superioribus inferentem consum-  
mati agonis vexillum, & inferioribus erexisse scalam in  
Patris occursum. Ibi dolorum & conuiciorum imme-  
mor, exponis quare derelictus fueris: indicans anxietates  
illius querimonia, verba esse derelictorū tuorū, quorum  
personam assumpseras, & reconciliationis causam age-  
bas. In qua pro seruis seruilem non dedignaris accipere  
personam: & in tantum infirmis compateris, vt nec cru-  
cifigi, nec mori, dum illi viuant, & te patrocinate non  
pereant, nec erubescas nec formides: altitudinem tuam  
derelinquens, ad tempus gloria tua maiestatem euacuans,  
vt redeant dispersi, & respirent derelicti.

## PRECATIO.

Domine Iesu Christe, ad te pientissimum Pastorem 1. Pet. 2.  
animarum nostrarum plena fiducia confugio, ne  
tu sinas me derelictum vlla tentatione superari. Qui  
grandi compassionis affectu innumeris te immeristi do-  
loribus & pœnis, vt ab eis me liberares: & cum infirmo  
d infirma-

*infirmaris, cum peccante contristaris, cum vim patienti conquereris: & pro infirmis tuis clamans deprecaris. Obsecro te summe & venerande. Pater Domini mei Iesu Christi, respice ad orationem filij tui dilecti: & suscipe Satisfactionem eius pro me. Angustia mihi sunt undaque: ne derelinquas me Domine, nec longè subtrahas auxilium tuam à me. Amen.*

Psal. 21.

## VERBUM V.

Postea sciēs Iesus, quia omnia iā cōsummata sunt, vt consummaretur Scriptura, dicit: SITIO. Vas ergo erat positum aceto plenum. Illi ergo spongiam plenam aceto hysopo circumponentes, obtulerunt ori eius. Ioan. 19.

## MEDITATIO.

**A**D locum deductus supplicij Domine Iesu, myrrha potaris & felle. Ac in cruce iam sublatu, atque opprobriis saturatus, cum aruisset tanquam testa virtus tua, o fons aqua viva, nostra salutis desiderio sitibundus, veluti pauper & mendicus, potum postulasti dicens: Sitio. At huic exigua petitioni qui succurreret, defuit: vt saltem calicem aque frigida, tibi aquarum omnium conditori porrigeret. Nequaquam enim impij illi tui sunt miseri: sed ad explendum malitiosi pectoris sui virus, protinus spongiam aceto implenerunt, & dulci ori tuo poculum amarissimum ministrarunt. Et impleta est scriptura in te, dicens: Dederunt in escam meam fel: & in siti mea potauerunt me aceto.

Psal. 21.

Psal. 68.

## PRECATIO.

**O**Fons aquarum viventium Domine Iesu: tu pro me pendebas in cruce infirmus, & infirmorū tibi solatia omnino defuerunt. Pro lecto duram crucem, pro cernicali spineam coronam, pro dapibus fel & acetum accepisti. Et cum vehementer sitires, non erat qui tibi  
urceam

ortem aqua exhiberet. Fac me iam nihil amplius in  
hoc mundo scire, nisi te: quoniam apud te est fons vitæ.  
Tu dixisti: Si quis sitit, veniat ad me & bibat. Sitiuit  
anima mea ad te Deum, inter: viuum: quādo veniam  
& apparebo ante faciem tuā? Pota me Domine de tor-  
tente gratia & voluptatis tue. Amen.

Pfal. 55.  
Ioan. 7.  
Pfal. 42.

## VERBUM VI.

Cum ergo accepisset Iesus acetum, dixit: CONSUM-  
MATVM EST. Ioan. 19.

## MEDITATIO.

**I**am Domine Iesu, voluntatem patris perfecisti: opus Ioan. 17.  
consummasti, quod dedit tibi ut faceres. Triginta tri-  
bus annis in terra peregrinatus es, & cum hominibus  
conuersatus: in itinere frequenter fatigatus, ab aduersa-  
riis grauiter calumniatus, à discipulo traditus, ab ami-  
cis derelictus, ab hostibus captus, à militibus flagella-  
tus, à iudicibus condemnatus, à pontificibus illusus, de-  
nique innocens in cruce clavis confixus es. Ibi adimplens Heb. 9.  
omnia quæ scripta erant de te, morte tandem consum-  
matus, factus es omnibus obtemperantibus tibi causa sal-  
utis aeternæ.

## PRECATIO.

**B**one Iesu, qui in principio omnia cum patre crea- Genes. 1.  
sti, & nunc cooperante eodem patre, in Spiritu  
sancto, cuncta recreasti in calo & in terra: qui hominem  
de terra limo sexto die conditum, sexto nunc die sangui-  
netuo redemisti, ac opus humana Redēptionis consum-  
masti: Perge in me, quæ desunt mihi adimplere, & quod  
cepisti consummare: ut adueniente vita mea termino,  
accursu consummato, eductus ex hoc carnis ergastulo  
apprehendam, te inuante & largiente, Vitam aeternam.  
Amen.

d a

VER-

Et clamans Iesus voce magna, ait: PATER, IN MANUS TVAS COMMENDO SPIRITUM MEVM. Et hæc dicens expiravit. Luca 23.

## MEDITATIO.

**Q**uam dulce spectaculum Domine Iesu, in cruce moriens exhibuisti. Caput habuisti inclinatum ad nos osculandum: brachia extensa ad amplexandum: manus perforatas ad largiendum: & totum denique corpus expositum ad nos liberandum: atque ita demum spiritum tuum in manus Patris commendaisti, & expirasti. At verò mortem nostram moriendo destruxisti: & vitam resurgendo reparasti. Gustasti mortem pro filiis hominum, ut qui in Adam moriebamur, in te vivificaremur, Ideoque & latet nos cæcā abimus, Ubi est Mors victoria tua? Ubi est Mors stimulus tuus? Deo gratias, qui dedit nobis victoriam per Dominum nostrum Iesum Christum.

Heb. 2.  
1. Cor. 15.

## PRECATIO.

**B**enignissime Iesu, Vita viventium, spes morientium, Salus omnium in te sperantium: ante cuius conspectum Mors fugit: ad cuius vocem mortui reniuescunt: qui pro me indigno famulo tuo dignatus es hanc vilissimam pati doloris formulam, ac spiritum tuum Patri tuo orans commendaisti & tradidisti. Da mihi gratiam tuam, ut exitum illum tuum erga me amorem, & mortem amarissimam sine intermissione in corde meo geram: & appropinquante vite mee sine, in luce miserationum tuarum respirem. Adesto mihi morienti, succurre agonizanti, occurre te desideranti, consolare gementem, robora trementem, refoue deficientem, suscipe expirantem. Ultimum verbum tuum in cruce, sit ultimum verbum

verbum meum in hac luce : & cum amplius loqui non  
possum, tu clementer exaudi desiderium meum. Pater, <sup>Psal. 30.</sup>  
in manus tuas commendo spiritum meum: redemisti me  
Domine Deus veritatis. Amen.

Confessio hominis peccatoris gementis & dolentis,  
seque causam Passionis & mortis fuisse Christi,  
Dñi sui fatentis, ad Deū Patrē misericordiarum.

**O** Creator & Domine cali & terra, maris & omnis **CAPVT**  
creatura, sancte, fortis, iuste & recte, miserator **XV.**  
& misericors Deus. Ego indignus, miser & infelix pec-  
cator confiteor me esse vilissimum & nefandissimū pec-  
catorum omnium: & tam enormiter offendisse oculos <sup>Luc. 15.</sup>  
Maieſtatis tue, ut nō sim dignus vocari filius tuus, imō  
ne infimus quidem seruus tuus: indignus omnino, ut ter-  
ra sustineat calcaneum pedum meorum. Qui non vno  
sed innumeris peccatis te offendi: quibus etiam unigeni-  
tum filium tuum, Dominum & Creatorem meum ma-  
nibus tradidi nocentium, & crucis subire coēgi tormen-  
tum: quem denuo, & saepe nimium insuper prolapsus, <sup>Heb. 5. 10.</sup>  
veluti conculcavi, & sanguinē testamenti pollutū duxi,  
in quo sanctificatus sum, & spiritui gratia contumeliam  
feci. Verū piissime Pater, quia pater misericordiarum <sup>2. Cor. 1.</sup>  
es, & Deus totius consolationis: cui propriū est misereri <sup>Ezech. 18.</sup>  
semper & parcere: qui non vis mortem peccatoris: de  
tua Misericordia summē confidens, peto indulgentiā &  
remissionem omnium peccatorum meorum, quibus vn-  
quam Bonitatem tuā offendi. Deus propitius esto mihi <sup>Luc. 18.</sup>  
peccatori. Non intres in iudicium cum seruo tuo: quia <sup>Psal. 142.</sup>  
non iustificabitur in conspectu tuo omnis viuens. Fac <sup>Psal. 85.</sup>  
mecum signum in bonum, ut videant qui oderunt me, &  
confundantur, quoniam tu Domine adiuuisti me, &  
consolatus es me. Amen.

Alia, Christo.

CAPVT

XVI.

Ex Hortulo  
animæ.Matt. 15.  
Luce. 7. 23.

**C**onditor cali & terra, Rex regū, & Dominus dominantium: qui me ex nihilo ad tuam imaginē & similitudinē fecisti, & sanguine proprio redemisti: quem ego peccator non sum dignus nominare: Te suppliciter oro, ut clementer me seruum tuum respicias. Misere mei: qui misertus fuisti mulieri Chananæa, & Maria Magdalena: qui pepercisti latroni in cruce pendenti, Parce mihi Domine: parce mihi Christo. Tu es Creator meus, & Redemptor meus: Rex meus, & Deus meus, Tu es spes & fiducia mea, vita & resurrectio mea: Domine, ne me despicias. Seruus tuus sum, quamuis malus: quamuis indignus: sed qualiscunque sum, tuus sum. Ad quem ergo fugiam, nisi ad te? Si tu me ciuis, quis me recipiet? Si tu me despicias, quis me aspiciet? Agnosce me indignum ad te confugientem: & propitius est mihi miserrimo peccatori. Dic anima mea, Salus tua ego sum. Amen.

Psal. 34.

Obsecrationes deuotissimæ, ad Deum Patrem.

CAPVT

XVII.

Ioan. Fisch.  
Epif. Ros.  
1. Ioan. 1.  
Rom. 3.

Esa. 43.

Esa. 9.  
Rom. 8.  
Ephes. 5.  
Esa. 53.

**D**omine ne in furore tuo arguas me: neq. in ira tua corripas me. Misere mei, misere mei, propter nomen tuum magnum. Et propter nomen sancti filij tui Iesu, quem misisti propitiationem pro peccatis nostris, per fidem in sanguine suo: propitius esto mihi peccatori, Ecce Pater sancte: ecce puerum tuum quem elegisti, ponens Spiritum tuum super eum: & mittens eum ut euangelizaret pauperibus, & sanaret contritos corde: ut consolaretur omnes lugentes, & predicaret captiuis indulgentiam. Ecce paruulum tuum, qui natus est nobis: cui etiam nō pepercisti, sed pro nobis omnibus in mortem tradidisti, oblationem & hostiam in odorem suauitatis. Verè languores nostros ipse in corpore suo tulit, & dolo-

res nos

rei nostros ipse portauit. Infirmatus est propter peccata nostra, & vulneratus est propter scelera nostra. Disciplina pacis nostra irruit super eum, & linore eius vulnera nostra sanata sunt. Omnes nos quasi oves errauimus, vnusquisque in viam suam declinavit: & tu Domine posuisti in eo iniquitates omnium nostrum, percutionem ipsum propter scelera populi tui. Corpus suum dedit percipientibus, & genas vellentibus: faciem suam non auertit ab increpantibus & conspuentibus in eum. In dilectione & misericordia sua perditos nos redemit: pacificans per sanguinem crucis sue, qua in calis & qua in terris sunt. Tradidit in mortem animam suam: & pro transgressoribus preces effudit.

Esa. 50.

Esa. 63.  
Ephel. 2.  
Esa. 53.

Respice clementissime Pater, quisnam ille qui passus est: et reminiscere obsecro, pro quibus passus est. Hic est enim innocens ille, quem cum essemus peccatores, ad mortem dedisti: num non multo magis iustificati in sanguine ipsius, salui erimus ab ira per ipsum? Si reconciliati tibi sumus, cum adhuc inimici essemus, per mortem filij tui: an non multo magis reconciliati, salui erimus in vita ipsius? Ecce agnum immaculatum, qui peccata mundi tollit: cuius pretioso sanguine redempti sumus de iniquitatibus nostris. Ecce mitissimum, innocentem: qui tanquam ouis ad occisionem ductus: dum male tractaretur, os suum non aperuit. Qui cum in forma Dei esset, nec rapinam arbitratus, esse se aequalem Deo: exinaniuit semetipsum, formam serui accipiens, & in similitudinem carnis peccati veniens, damnauit peccatum in carne, humiliansque semetipsum, tibi Pater factus est obediens vsque ad mortem, mortem autem crucis: atque illic chirographum, quod aduersum nos erat decreti, debebat: & tollens illud e medio suffixit cruci: in qua expolians principatus & potestates traduxit confidenter,

Rom. 9.

Ioan. 1.

Esa. 53.  
Philip. 2.

Rom. 8.

Philip. 2.  
Colosi. 2.

Hebr. 13.

fidenter, palam triumphans eos in semetipso.

Apoc. 1.

Tit. 2.

1. Pet. 1.

Heb. 9.

Ioc. 14.

2. Pet. 3.

Pfal. 24.

Pfal. 142.

Pfal. 129.

Iob 4.

Pfal. 129.

Pfal. 24.

Pfal. 102.

Pfal. 77.

Pfal. 83.

Esa. 53.

1. Pet. 1.

Expia me o Pater sancte, per sanguinem testamenti aeterni, filij tui dilecti: qui dilexit nos, & lauit nos a peccatis nostris in sanguine suo, & redemit nos ab omni iniquitate. Purifica cor meum per sanctificatione spiritus tui, & asperzione sanguinis filij tui: ab omni immunditia peccati & conscientia mala: & iniquitatum mearum ne memor sis amplius. Quoniam Deus es tu, bonus & misericors, ac patiens erga nos: nolens aliquos perire, sed omnes ad penitentiam reuerti. Secundum misericordiam tuam magnam, memor esto mei tu propter Bonitatem tuam Domine. Ne in eas iudicium cum seruo tuo: etenim si iniquitates attendas Domine: Domine quis non cadet in conspectu tuo? Hoc enim pro certo est, quod coram te nemo viuens iustificabitur. Cum aduersus angelos tuos peruersi quid reperisti: quanto magis in homine, qui est abominatio & factor: & domum inhabitat luteam, & bibit sicut aquas iniquitatem? Sed quoniam tecum est propitiatio: spes mea in te Domine Deus, cui fidit anima mea. Anima mea te expectat: quoniam tecum est misericordia, & copiosa apud te redemptio. Vniuersa via tuae misericordia. Quam mitis est pater in pueros suos, tam mitis es Domine erga timentes te: & pro abundantia misericordiae tuae, indulges infirmitatibus nostris. Agnoscis figmentum tuum: recordaris quales sumus, nempe, nullius firmitatis.

Miserere mei o Domine Deus salutis meae: & propter gloriam nominis tui libera me. Propitius esto peccatis meis, propter nomen sanctum tuum. Pater pie, ne attendas multitudinem iniquitatum mearum: sed respice in faciem Christi filij tui sancti: qui peccatum non fecit, & peccata nostra pertulit in corpore suo super lignum crucis. Auerte faciem tuam a peccatis meis: &

omnes



omnes iniquitates meas dele. Ne auertas faciem tuam  
à me: ne declines in ira à seruo tuo. Adiutor esto mihi,  
ne deseras me, neque despicias me Domine Deus meus.  
Amen.

Psal. 50.  
Psal. 26.

## INITIVM PSALMI XXX.

Cuius verbis vsus est Christus in cruce, cum Patri  
suo caelesti moriens Spiritum suum commenda-  
ret. Luca 23.

**I**N te Domine speravi, non confundar in aeternum: in  
Iustitia tua libera me. CAPVT  
XVIII.

Inclina ad me aurem tuam: accelera vt eruas me.  
Esto mihi in Deum protectorem, & in domum refu-  
gij: vt saluum me facias.

Quoniam fortitudo mea, & refugium meum es tu: et  
propter nomen tuum deduces me, & enutries me.

Educes me de laqueo hoc, quem absconderunt mihi:  
quoniam tu es protector meus.

In manus tuas commendo spiritum meum: redemisti  
me Domine Deus veritatis.

Precationes, vel potius Eiaculationes praecipuorum  
Apostolorum, quas sub extremam vitae horam,  
ad D.N. Iesum Christum emiserunt.

## S. Petri Apostoli morientis.

## PRECATIO.

**G**Ratias tibi ago Domine Iesu Christe, Fili Dei vi-  
ui: non solum voce & corde, sed spiritu quo te di-  
ligo, quo te intelligo, quo te video. Tu mihi omnia, & in  
omnibus: tu mihi totum: & nihil mihi aliud praeter te so-  
lum: qui es bonus, & verus Dei filius Deus. Cui cum  
aeterno Patre & Spiritu sancto honor & gloria est, in  
aucta semper secula seculorum. Amen.

CAP. XIX.  
Abdias vel  
eius inter-  
pres Africa-  
nus lib. 1.

d s

S. Ioan-

S. Ioannis Apostoli, sub extremam vitæ horam.

PRECATIO.

*Mem. lib. 5.* **S**uscipe me Domine Iesu: ut cum fratribus meis sim. **A**peri mihi pulsanti ianuam vitæ: principes tenebrarum non occurrant mihi: nec veniat mihi pes superbie, & manus extranea à te non contingat me: sed suscipe me secundum verbum tuum, & perduc me ad convivium epularum tuarum, vbi epulantur omnes amici tui. Tu es enim Christus filius Dei vivi, qui precepto Patris mundum saluasti: qui & Spiritum sanctum tu: in nobis destinare dignatus es. Per eundem Spiritum tibi gratias referimus, per infinita secula seculorum. Amen.

S. Thomæ Apostoli.

PRECATIO.

*Mem. lib. 9.* **T**V Domine, qui animam inopem replere consuevisti, imple ea qua mihi desunt: & esto mecum, donec ad te veniam, & te videam.

Precationes Apostolicorum virorum & Martyrum, SS. Polycarpi & Cypriani, cum iam iam calicem Domini bibituri essent.

S. Polycarpi Martyris, Smyrnen. Episcopi.

PRECATIO.

CAPVT

XX.

*Euseb. Eccl. Hist. lib. 4. cap. 15.*

**D**eus dilecti & benedicti filij tui IESV CHRISTI Pater, per quem tui agnitionem suscepimus: Deum Angelorum & Virtutum & uniuersæ creaturæ, ac totius istorum generis, qui omnes coram te viuunt: benedico te, qui me in hanc horam perducere dignatus es, ut particeps existerem calicis Christi tui: in resurrectionem vitæ aternæ, anima ac spiritus mei, per incorruptionem Spiritus sancti. In omnibus laudo te, & glorifico te: per aeternum Deum & Pontificem IESVM CHRISTVM, dilectum filium tuum: per quem, &

CU

num quo, tibi cum Spiritu sancto, gloria, & nunc, & in  
 futura secula. Amen.

S. Cypriani Martyris, & Episcopi Carthag.

## PRECATIO.

**D**omine sancte, Deus bagios Pater, ad te leuavi  
 animam meam: Deus meus tibi gratias & laudes  
 refero. Tu omnium Dominus dominatum, libera me de  
 hoc seculo: & exaudi me orantem, sicut exaudiisti filios Exodi 2.  
 Israel de terra Aegypti.

Rogo Domine, subueni mihi: noli me secundum actum  
 meum iudicare: nihil enim in preceptis tuis parui. Ex-  
 audi me orantem, sicut exaudiisti Ionam de ventre ceti; Ionæ 2.  
 sic exaudias me, & eicias me de morte ad vitam, Sicut Ionæ 3.  
 Niniuita induerunt cinerem & cilicium, & pœnitenti-  
 tiam egerunt ante Dominum: ita & ego exomologesin-  
 faciens ante conspectum tuum, pro uniuersis peccatis meis: Psal. 14.  
 qui es amator pœnitentiæ, miserere mei. Sed et Dauid di-  
 cit: Dñe, propter nomen tuum dele peccatum meum: & ego  
 deprecans maiestatem tuam, dele uniuersa peccata mea.

Exaudi me orantem, sicut exaudiisti tres pueros de Dan. 3. 6.  
 camino ignis: & sicut exaudiisti Danielelem de lacu leo- Tob. 8.  
 num. Exaudi me, sicut exaudiisti Tobiam & Saram,  
 dum orarent in atrio domus sue: & sicut exaudiisti Su- Dan. 13.  
 sannam inter manus seniorum. Exaudi me orantem, sicut  
 exaudiisti Ezechiam regem Iudæ, & delesti ab eo infir- 1. Reg. 10.  
 mitatem: sic & à me auferas infirmitatem carnis: &  
 augeas mihi ad fidem, sicut illi auxisti annos quindecim  
 ad vitam. Te deprecor Pater maiestatis: qui in fine tem-  
 porum miseratus es nostri, mittens nobis IESVM CHRI-  
 STVM, Dominum Deum Saluatorem nostrum, natum  
 ex Maria uirgine de Spiritu sancto, nunciante Ga- Luc. 7.  
 briele angelo: per quem nos liberaisti de periculo mor-  
 tis imminenti.

Et te

Et te deprecor Filium Dei unigenitum, propter uniuersa commissa mea: qui fecisti tanta mirabilia: qui es in calis, filius in patre, & pater in te in sempiternum: qui sedes super Cherubim & Seraphim honoris tui. Tibi assistunt Angeli, Archangeli, numerus innumerabilis, timentes ac parentes honorem & virtutem tuam: clamantes voce magna & dicentes: Sanctus, Sanctus, Sanctus Dominus Deus Sabaoth. Tu ipse nobis testamentum fecisti: Petite & accipietis: pulsate & aperietur vobis. Quodcumque a Patre meo petieritis in nomine meo: ego a Patre peto, ut accipiat. Ego peto ut accipiam: quero ut inueniam: ego pulso ut aperiat mihi: ego in tuo nomine peto, ut tu a Patre petas, & detur mihi. Paratus sum propter nomen tuum victimam sanguinis fundere: & quodcumque tormentum sustinere. Tu es Domine Adiutor meus & Defensor: defende me ab aduersario meo. Angelus tuus lucis protegat me: quia tu dixisti, Quod credentes petieritis per orationem, dabitur vobis. Omnis homo mendax: tu es verax. Sicut tu promissisti, potestatem habes Domine dare mihi omne sacramentum caeleste: ut dignus sim faciem sanctorum tuorum videre. Spiritus in me operetur, voluntas tua in me fiat: quoniam tibi spondi omnibus diebus vita mea: qui passus es sub Pontio Pilato, bonam confessionem: qui crucifixus descendisti, & conculcasti aculeum mortis. Deuicta est mors: deuictus est inimicus diabolus. Tu resurrexisti a mortuis, & apparuisti Apostolis tuis, sedes ad dexteram Patris: qui venturus es iudicare vivos & mortuos. Tu dominaberis: libera me de manu querentis animam meam. Per nomen tuum libera me ab aduersaria potestate, ut opem des vincendi inimicum meum: quoniam tu es potens assessor & Aduocatus precum & petitionum nostrarum animarum. Die ac nocte interpellas pro peccatis

Dan. 7.  
Esa. 6.  
Apoc. 4.

Matt. 7.  
Ioan. 16.

Matth. 11.

Psal. 115.

1. Tim. 6.

latis meis : orationem meam perferas ad Patrem tuum.

Et tu Domine sancte Pater, dignare respicere super preces meas : sicut respexisti super munera Abel. Genes. 4 Dignare me liberare ab igne & pœna perenni : & ab omni tormento, quod parasti iniquis : per bonum & benedictum IESVM CHRISTVM Saluatorem nostrum, per quem tibi laus, honor, virtus, gloria, in secula seculorum. Amen.

S. Hieronymi in agone mortis constituti Eiaculationes, ad Iesum Christum D.N.

**D**omine Iesu Christe, Refugium meum & Virtus, **CAPVT**  
 Susceptor meus & Liberatores meus : in quẽ speravi, cui credidi, quem dilexi: turris fortitudinis, et spes mea à iuventute mea: operi manuum tuarum, cui vita & misericordiam tribuisti, tuæ clementia porrige dexteram. Tu susceptor meus meus es, gloria mea, & exaltas caput meum: suscipe me secundum multitudinẽ miserationum tuarum. Qui latronẽ in cruce moriens suscepisti.

Exurge Domine, adiuua me : exurge & ne repellas in finem: suscipe seruum tuum in bonum. Propter hoc namque non relinquens Patris dexteram, adhesisti humanitati meæ: os ex ossibus meis, & caro de carne mea: factus Deus & Homo, ut confidenter ad te accederem, quasi ad fratrem: & tuam mihi misericorditer donares Diuinitatem. Pfal. 43. 11

Sicut seruus præstolatur finem operis sui : sic & ego Iob 7. expecto te Domine. Intret postulatio mea in conspectu tuo: fiat manus tua ut saluum me faciat.

Ecce virum, qui descendens à Hiericho, captus à latronibus, & vulneratus, seminivus relictus est: tu pie Samaritane recipe me. Peccavi nimis in vita mea: & malum coram te feci. A planta pedis vsque ad verticem Luc. 10. Ega. 1.

cerm

Matth. 17.  
Luc. 18.

*cem capitis, non est in me sanitas. Sana me tu Domine,  
& sanabor: saluum me fac & saluus ero.*

*Cecum iuxta viam clamantem, IESU FILI DAVID  
MISERERE MEI: lumine tua visionis aeterna illumina.*

Psal. 122.

*O lux inuisibilis, illumina oculos meos, ne unquam ob-  
dormiam in morte: ne quãdo dicat inimicus meus, Pre-  
ualui aduersus eum.*

Psal. 50. 118

*Auerte faciem tuam à peccatis meis: dele iniquitates  
meas, secundum magnam misericordiam tuam. Ne pro-  
iicias me à facie tua.*

Luc. 17.

*Ego sum Onis, qua erravi: require eam bone Pastor,  
& appone ouili tuo. Verè non sum dignus vocari filius  
tuus: quia peccaui in calum & coram te.*

Psal. 102.  
Psal. 78.

*Non secundum peccata mea facias mihi, neq. secun-  
dum iniquitates meas retribuas mihi: sed adiuua me  
Deus salutaris meus, & propter gloriam nominis tui li-  
bera me. Benigne fac in bona voluntate tua, ut inhabi-  
tem in domo tua omnibus diebus vite meae: ut in seculum,  
seculi cum habitantibus in ea laudem te.*

Psal. 50.  
Psal. 26.

*Ne declines in hac hora à seruo tuo: expecto te Dñe.*

Psal. 29. 30.

*Credo videre bona Dñi in terra viventiu. Conuerte  
placitum meum in gaudium mihi. Inclina ad me aurem tuam:  
accelera, ut de hac lachrymarum valle eripias me. Amen.*

Ultima D. Hieronymi morientis Verba.

*E C C E ad te venio, pie IESU: suscipe animam meam,  
quam tuo recuperaſti Sanguine.*

Precatiuncula Iuliani Episcopi, Toletani.

**CAPVT**

**XXII.**

Floruit. ante  
saeculos D. CC.

**D**esertum Idumaea cecus & morbidus possessor in-  
habitans, clamo ad te IESU fili David: miserere  
mei. Patriam enim meam, aeternam Hierusalem quero,  
ciues eius contemplari desidero: & quibus ductoribus il-  
luc transcam, non inuenio. Tu ergo qui te metipsum mihi  
dignatus

dignatus es ostendere *Viam*, porrige mihi manū tuam. Peto, ut per te, qui *Via* es, gradiar: in te, qui es *Veritas*, non offendā: ad te, qui *vita* es, perueniā: a te qui *summa* felicitatis es auctor, nullis casibus diuidar: nullis impedimentis abrumpar. Angelicis morientem me excubis protege: & vocatum ad te protenso pietatis gremio consolare. ut ad te sine confusione perueniens, videā qua bona sunt *Hierusalem*, omnibus diebus *vita* mea. Amen.

S. Thomæ Aquinatis Eiaculatio.

O *PIE Pelicane* *IESV* Domine, me immundū munda tuo sanguine. Cuius vna stilla totum mundum saluum facere posset omni scelere.

Alia Precatiuncula, in mortis agone vsurpanda.

Ex *Tobiæ* Cap. 3.

**N**unc Domine memor esto mei. Domine secundum **CAPVT** voluntatem tuam fac mecum: & praecepe in pace **XXIII.** recipi spiritum meum.

Quemadmodū Dñe *Iesu* *Christe*, te iubente, in tuam Ex Agenda Herbipol. promissionem in aqua & spiritu sancto, mediāte *Pasione* & *Morte* tua in filium Dei regeneratus sum: ita te donante, in eandē promissionē credidi. Et nunc Dñe, de tua miseratione confisus, volens et lubens hanc quam donasti reddo animam: da ut promissionis tuae veritatem adeptus, te Deum Creatorem, Redemptorem & Saluatorem meum in aeternum magnificem. Amen.

Pro ea Dñe *IESV*, qua erga te mihi est fiducia, oro atq; obtestor, ut omnis dira illius in corpore tuo *Pasione* tuae acerbitas, Patri pro meorū meritis scelerū nunc propitiatoria sistatur hostia: ut eius *Merito*, in meo hoc excessu anima mea ab omni terrore libera, eo peruehat, ubi nulla torquet tristitia. Amen.

Laus & honor & gratiarum actio, sit tibi Dñe *IESV* *CHRISTE*, pro *Pasione* & *Morte* tua acerbissima.  
Te Re-

Te Redemptorem & Salvatorem meum agnosco. Tu mundum, tu peccatum & infernum viciisti: ne quid detrimenti mihi adferant. In hoc spero, in hoc acquiesco: sit tantum miseratio tua mecum. Ne derelinquas me in his maximis angustiis meis Domine. Amen.

Adauge Domine Iesu Christe fidem & fiduciam meam in te: ne quid de diuina tua Miseratione addubitem. In gratia tuae promissionibus o Domine custodi me. Nunquam excidat, quia tu Saluator meus, spes mea. Domine adsis mihi: & secundum magnam misericordiam tuam animam meam suscipe: qui tuum ipse Patri commendaſti spiritum. Amen.

Simon Veterpeus.

Obsecro te benignissime Iesu: ut quoniam ipse qui te aspiciam, indignus sum: tu me propitius misericordie tuae oculis respicere digneris: quibus in domo Caipha Petrum te abnegantem, Magdalenam pedibus tuis aduolutam, & Latronem in cruce misericorditer respexisti.

Dan. 3. & 9.

In spiritu humilitatis suscipiar a te Iesu Christe, Vita & salus anima mea. Neque enim in iustificationibus meis prosterno preces meas ante faciem tuam, sed in miserationibus tuis multis.

Luc. 15.

Ego Ovis illa amissa ad te Pastorem & Curatorem anima mea redeo: vocem tuam solius noui, non alienorum. Peto Domine, ut ad ouile me reducas: Potestne spernere vocem clamantis & confugientis ad te? Nonne tu dixisti: Clamauit ad me: & ego exaudiam eum, cum ipso sum in tribulatione: eripiam eum & glorificabo eum?

Psal. 90.

Psal. 27.

Ecce clamo, plus corde quam ore. Domine, tribulatio proxima est: & non est qui adiuuet, nisi tu bone Iesu. Non ausim affectare felicium sedes spirituum, qui speciem intuentur sanctissime Trinitatis: portio tamen creaturae tuae postulo micam suauissima mensa tuae. Nimmium



mum mihi fuerit, si subtus calcaneum infimi electi tui  
oculum aliquem huic puillo famulo tuo non negaueris.

Creator & Redemptor meus Iesu Christe: pone Pas-  
sionem, Crucem et Mortem tuam, inter iudicium tuum  
& animam meam. Totum me tibi dedo: non me renuas.  
ad te venio, non me reiicias.

Nunc Domine secundum voluntatem tuam fac me-  
cum. In manus tuas commendo spiritum meum: redemi-  
sti me Domine Deus veritatis. Sonet in mentis mea au-  
ribus vox illa dulcis: Hodie mecum eris in paradiso. Tob. 3.  
Psal. 30.  
Luc. 23.

## DEO OPT. MAX.

**A** Eterne Deus, Pater D. N. Iesu Christi, quem à  
mortuis reuocatum, ad tuam dexteram colloca-  
sti, ut sit pro nobis aternus apud te intercessor: sustenta  
me in isto mortis agone spiritu sancto tuo, meq; clemen-  
ter ex his corporis vinculis exolue: atque pretioso san-  
guine filij tui redemptum, transfer in sinum Abrahe,  
Vitamque sempiternam. Amen.

## VLTIMA CHRISTI IESV VERBA.

Pater in manus tuas commendo spiritum meum. Luc. 23.

## S. STEPHANI VLTIMA VERBA.

Domine Iesu, suscipe spiritum meum. Acto. 7.

## APOCALYPSIS XXII.

Veni DOMINE IESV.

e LIBER